



Our da las trattativas da la suprastanza cumünala dal Cumün da Zernez da schner fin mai 2011

PLANISAZIUN

Vendita da parcelas in Ruzön II

Las trattativas culs respunsabels da la Chascha da pensiun chantunala sun finidas giò. Ils pass da planisaziun dal müdamaint dal plan da quartier Ruzön II per la part da la parcella no. 1229 han pudü gnir tuttas per mans e manadas tras.

Las ultimas duos parcelas in Ruzön II han eir pudü gnir vendüdas a las famiglias Purtscheller/Thomas da Samedan e Sepp-Kaufmann da San Murezzan. Uschè sun vendüdas tuot las parcelas da fabrica in possess cumünal illa part II dal quartier nouv Ruzön.

Cumischiun "chasas vödas in cumün"

Quista cumischiun es installada per chattar soluziuns fatiblas futuras per revitalisar las chasas vödas i'l minz dal cumün vain sustgnüda d'ün proget da giubileum dal büro STW AG a Cuaira. Tal büro metta a disposiziun munaida per realisar ün proget scolastic per students sül sector da la planisaziun locala.

Planisaziun regiunala

La regiun Pro Engiadina Bassa es landervia a surlavurar il plan directiv regiunal cullas parts integralas ed importantas dal concept d'abitadi e culla part da la problematica da las seguondas abitaziuns. Quist plan es gnü suottamiss als cumüns per l'examinaziun. In seguit vain tal protramiss al chantun per l'examinaziun preliminar. 1

Planisaziun da quartier Ils Muots

La planisaziun dal quartier Ils Muots in Brail es iniziada culs prüms pass da publicaziun. La lavur da preparaziun es surdatta al büro STW AG a Cuaira. Per quista planisaziun segna la suprastanza cumünala respunsabla.

Planisaziun da quartier Muglinè

Culla revisiun parziala da la planisaziun locala dal 2006 ha il suveran decis da vulair impegnar ün livé da planisaziun da quartier pel quartier da Muglinè. La suprastanza ad hoc es landervia a preparar quista planisaziun, impustüt eir a basa da discussiuns persunalas culs intretschats. I's prevezza da proseguir culla planisaziun e da tilla pudair decretar amo d'ürant quist on.

Planisaziun locala – iniziativa parcella no. 138 Viel da Runatsch

In seguit a l'entrada d'ün'iniziativa entrada als 2 gën 2010 e suottascritta da 46 iniziantas ed iniziants, chi han perseguità il böt da vulair impedir la surfabricaziun da la parcella privata no. 138 in Viel da Runatsch, ha la suprastanza cumünala inizià üna procedura da planisaziun e d'intervenziun cun preschantar üna cuntraproposta al suveran. La radunanza cumünala es lura seguida als 20 d'avrigl a quista proposta, chi prevezza diversas restricziuns da fabrica per la possessura da la parcella. La revisiun da la planisaziun locala es uossa actualmaing pro la regenza chantunala chi tilla sto amo approvar.

Biosfera Val Müstair – Parc Naziunal Svizzer

Ils presidents cumünals dals cumüns tanter S-chanf e Scuol sun gnüts infuormats sur dal proget da la Biosfera Val Müstair chi metta avant divers schlargiamaints da zonas da restricziuns intuorn il PNS. La suprastanza cumünala s'occupa da quist proget.



Ruzön III

Culla Viafier Retica s'ha pudü trattar cun success sur da la cumprita da lur parcella no. 219 in Muglinè per schlargiar il quartier d'abitar futur Ruzön III. La cumprita es gnüda approvada da la radunanza cumünala. Implü s'ha scholt üna pendenza veglia e concess a la VR il permiss da gestiun dal binari da s-chargiar in Muglinè cun arrandschar tschertas restricziuns e cundiziuns.

TRAFIC

Fabrica da sanaziun/ingrondimaint da la staziun da la Viafier Retica

Il proget manzunà es in plaina fabrica e la suprastanza cumünala vain confruntada cuntinudamaing cun dumondas da trar a nüz sinergias in connex cun quist proget fich complex. La radunanza cumünala ha decis illa radunanza cumünala dal mais avrigl sur d'ün credit implü da 266'000.00 francs per adattar e schlargiar l'infrastructura cumünala güst in connex cun quista fabrica. I fa sen da tour avant quistas lavurs güst cha s-chavs sun averts e cha maschinas sun sül lö.

Signalisaziun

La prüma fasa da la signalisaziun in cumün es serrada giò e'l resultat es cuntantaivel. La part da la signalisaziun our d'cumün dà andit a discussiuns plü grondas. In seguit ad üna surelavuraziun da las ideas per las entradas da cumün ha la suprastanza cumünala decis per üna varianta da fuormaziun da las entradas da cumün. La cumischiun da signalisaziun gnarà a preparar l'affar.

Trafic public Zernez fin Zuoz

Sün dumonda s'ha s-chaffi in collavuraziun culs implants da skis da Zuoz üna colliaziun d'apport tanter Zernez e Zuoz per la stagiun d'inviern. Quista spüerta es gnüda frequentada a cuntantezza dals respunsabels. Natüralmaing cha la situaziun actuala sün quist sector nu po cuntantar e cuntinuar. Spordschessan nempe güst trais servezzans lur spüerta sün quist sector e traget. Viafier Retica, Engadin Bus, AutoDaPosta GR e'l bus da skis. La suprastanza tratta actualmaing culs respunsabels, eir dal Circul d'Engiadin'Ota, sur da soluziuns pussiblas pel futur.

Sanaziun via chantunala Scheschna – Ova dal Sagl

L'uffizi chantunala da construcziun bassa ha infuormà sur dal proget da sanaziun da la via chantunala tanter Scheschna ed Ova dal Sagl. Il proget chantunala prevezza investiziuns da 12 milliuns francs. Tanter oter vain schlargiada la via chantunala, sanadas las duos gallarias e sgürà la via cun raits e cuntschets cunter crappa. Il cumün ha fat propostas da cumpletar il proget in Scheschna cun ün trottuar lung la via e cun adattamaints da l'infrastructura publica. Il suveran gnarà a decider sur d'ün credit correspondent.

Plazza d'aspet trafic per Livigno

In connex culla tematica da la deponia es la suprastanza cumünala landervia a chattar insembel cun l'uffizi chantunala üna soluziun dürabla per la piazza d'aspet pel trafic tras il tunnel La Schera. Quistas duos dumondas fan sen da gnir cumbinadas.

SCOULA

Cumischiun "avegnir chasas da scoula"

La cumischiun installada chi s'occupa da l'avegnir da las chasas da scoula a Zernez es landervia ad evaluar ils bsögns e propostas per la realisaziun da tals.



Consorti da scoulas Ardez-Zernez

Il rendaint final dal Consorti da scoulas A-Z ha serrà giò cun ün surplü da sortidas remarchabel plü ot sco l'on passà, ma eir plü ot sco'l preventiv. La suprastanza temma ün augmoint da cuosts sün quist sector ed ha decis da vulair collavurar e communicar plü stret cul cussagl da scoula per cugnuscher plü bain ils scopos da quist svilup. Quista collavuraziun dess gnir instituzionalisada periodicamaing.

Ultra da quai es gnü infuormà il cussagl da scoula sur dal proget da fusiuns da cumüns tanter Zernez e Guarda acutalmaing in trais-cha.

INFRASTRUCTURA

Ourvra electrica pitschna Val Sarsura

La produziun da forz'electricca cun forzas regenerablas es, resta e gnarà adüna plü importanta. La Val Sarsura spordscha quia premissas interessantas per laschar sclerir sch'ün'ouvra electrica pitschna füss pussibla ed economica. Ün perit es actualmaing landervia a sclerir detagls per pudair decider sur dal proseguimaint. Prüms sclerimaints han manà implü a la conclusiun chi'd es pussibel da schoglier la problematica da la sanaziun da la sablunera dal provedimaint d'aua da la Val Sarsura, chi fa fich dabsögn da tour per mans, cun integrar tala i'l inchaschamaint d'ün ouvra electrica futura.

Ils sclerimaints futurs muossaran scha quist proget es abel da gnir realisà e suot che cundiziuns.

Proget lets da chüra

La populaziun es gnüda infuormada sur da l'intent da vulair s-chaffir in nos cumün üna grupp da chüra cun nouv lets da chüra. Per pudair proseguir cul proget, sustgnü da la regenza e dal CSEB, faja dabsögn da chattar ün architect chi piglia sü la lavur da progettaziun. In seguit a quista lavur vain la radunanza cumünala a decider sur dal proseguimaint dal proget.

In connex cul lö per la realisaziun dal proget ha la suprastanza stuvü decider a disfavour da la chasa Röven 8 ed a favur da la parcella cumünala 151 güst dasper il Center cumünal. Quista decisiun es motivada culla grondezza dal proget ed impustüt cullas restricziuns chi regnan sülla parcella in Röven.

TURISSEM

Grupp da lavur „futur turistic“

Quista grupp es actualmaing landervia a preparar la basa per decider sur dal futur turistic. I's tratta quia d'evaluar las prestaziuns, servezzans e cuosts da las differentas pussibilitats actualas sül sector dal marketing e da la vendita turistica.

Festival da musica in Charal

Il festival da musica „1. Engadin Spirit 2010“ ha gnü lö be cun üna part dal success giavüschà dals organisaturs. L'evenimaint es gnü acceptà per fich gronda part da la populaziun. Las bunas reacziuns dals affars in cumün han dat andit d'improvar amo üna vouta. La suprastanza cumünala ha sün quai güdichà minuziusamaing la dumonda d'ün'organisaziun da pudair organisar dal 2011 darcheu ün evenimaint simil. Cun resguardar las experienzas fattas dal 2010 e cun metter cundiziuns cleras e restrettas ha la suprastanza darcheu concess il permiss pel evenimaint a Charal.

TOP Engadin

L'organisaziun turistica TOP Engadin es gnüda scholta in seguit a las restructuraziuns turisticas dals ultims ons. La collavuraziun tanter ils cumüns da Zuoz fin Zernez as voul però conservar inavant cun mantegner la piazza dal coordinatur turistic chi'd es a partir dal mais mai impiegà dal Cumün da Zernez.



ORGANISAZIUN

Proget fusiuns da cumüns Guarda fin Zernez

Sün dumonda dals cumüns da Guarda, Lavin e Susch vaiva la suprastanza cumünala decis da vulair as participar vi d'ün proget da fusiuns da cumüns tanter Guarda e Zernez per avair üna survista profuonda d'avantags e dischavantags d'üna fusiun pussibla. Üna grupp da proget chi's cumpuonna da persunas da tuots quatter cumüns e da las spartas strategicas ed operativas es actualmaing illa elavuraziun da las basas da discussiun. Il cussagl da scoula es fingià gnü infuormà in chosa. Ulteriuras infuormaziuns sun previssas eir a la populaziun i'l proseguimaint dal proget.

Sunteri

Sün dumonda da divers privats ha la suprastanza cumünala decis da vulair s-chaffir sün sunteri la pussibilità da trar a nüz fossas d'urna da famiglia. Ils detagls da l'organisaziun da quistas fossas ston amo gnir reglats in ün reglamaint correspondent.

Explotaziun da gera da l'En in Sosa

L'uffizi chantunal per la natüra e l'ambiant ha comunicà d'avair desdit il dret d'explotaziun da gera da l'En a la firma Sosa Gera SA sülla fin dal 2013. La suprastanza ha in seguit intervgnü pro'l chantun ed ha signalisà l'intent da vulair mantegner quista pussibilità a Zernez. Culla gestiunadra da la chava da gera s'es landervia a trattar sur da las cundiziuns dal contrat da concessiun. La radunanza cumünala stuvarà in seguit decider in chosa.

RUMENT ED IMMUNDIZCHAS

Deponia Ova Spin

La Pro Engiadina Bassa ha rendü attent sülla problematica chi regna illa regiun mancanza da deponias da material da s-chav net. Sün quai ha evaluà la suprastanza diversas pussibilitats. Sper duos dumondas da partidas privatas d'organisar üna deponia sün terrain privat s'ha tscherchà üna soluziun publica. Resguardond cha chantun e regiun preferischa da s-chaffir üna deponia regionala resp. intercumünala cun ün volüm grond ed a lunga dürada s'ha chattà ün lö, tenor la suprastanza cumünala, ideal ed adattà. La deponia uriunta da las OEE ad Ova Spin pudess gnir reactivada ed uschè as pudess far adöver da quist lö per deponar material da s-chav. L'organisaziun da la deponia restess pro'l cumün, quai chi maness gronds avantags, na sco ultim vers las instanzas chi ston conceder amo l'ün o l'oter permiss resp. approvar l'ün o l'oter müdamaint da zonas. La deponia pudess gnir organisada pels prossems 25 ons. Il volüm da deposit as importa blera 100'000 m3. La PEB ha tut sü quist lö i'l plan directiv regional e voul eir insembel cul cumün prochatschar quist proget. Il cumün es persvas d'avair chattà ün lö adattà per ün simil intent. La instanzas politicas chantunalas, regionalas e cumünalas sco eir la Corporaziun da vaschins han e vegnan intretschats i'l andamaint dal proget.

Deponia Sur Röven

La deponia cumünala da material da s-chav in Sur Röven es implida e vain fuormada a fin e serrada giò d'urant quist on.

Allontanamaint d'immundizchas da chasa

In connex cullas activitats da la PEB pel contrat futur d'allontanamaint d'immundizchas ha la suprastanza cumünala preparà ün concept per l'allontanamaint d'immundizchas a Zernez. I's prevezza da s-chaffir in cumün divers lös d'allontanamaint cun far adöver dal sistem suotterran "moloc". Quist sistem ha l'avantag ch'el es adüna disponibel. Plünavant as spetta üna reducziun da cuosts d'allontanamaint. Ils lös uriunts da deposit d'immundizchas vegnan redots resp. levats cun quai successivmaing.